

江西詩徵

江西詩徵卷十六

南城曾煥寶谷編輯

宋

黃希

希字夢得宜黃人乾道二年進士官永新令有政聲

題石碧

誰賦阿房未霽虹祇誇複道峭凌空那知海石驅來處都  
在巖花晏坐中鯨背遠衝千嶂雨鼉頭高占一天風漫郎  
更有中興頌倩把蒼崖仔細礱

趙汝愚

汝愚字子直宋宗室祖不求監餘干酒稅因家焉  
乾道二年進士第一光宗朝叅知政事除右丞相  
爲韓侂冑所忌謫永州卒追諡忠定理宗時晉封  
福王有詩文集

金溪寺梅花

金溪有梅花蘊蘊平生愛之看不足故人愛我如愛梅來  
共寒窗伴幽獨紛紛俗子何足云眼看桃李醉紅裙酒狂  
耳熱仰天笑不特惡我仍憎君但令梅花繞僧屋梅裏扶  
疎萬竿竹相逢歲晚兩依依故人冰清我如玉

同林擇之姚宏甫游鼓山

幾年奔走厭塵埃此日登臨亦快哉江月不隨流水去天

風直送海濤來故人契闊情何厚  
禪客飄零事已灰  
燕燕人生祇如此  
虛闌獨倚更徘徊

致爽軒

濃陰夾道水流渠  
吹盡殘花不復餘  
唯有范家三畝竹  
青依舊色侵書

趙善堅

善堅字德固  
宋宗室家  
宜春乾道二年進士  
簽書  
婺州判官  
朱子甚器之

化成巖

低帽白蕉衫  
跨馬北巖路  
爲我撒炎歊  
時有清風度  
杖策蹠遊屐  
捫蘿窮幽趣  
怪石鳴瘦筇  
狹徑窘危步  
雲間啟深

洞玲瓏天巧露僧居羅上下鐘聲答朝暮長嘯排翠靄  
棋驚振鷺陶寫屏絲竹恐爲風景污拂薜題蒼崖縱橫醉  
中句茲游豈易得載酒莫辭屢

黃人傑

人傑字叔萬南城人乾道二年進士

次袁尚書巫山十二峯二十五韻

文昌老仙絕俗姿愛山成癖非兒癡胷中況自有邱壑攬  
結瑰異常恐遲坤維謀略出分閭江山致助手出奇尋幽  
選勝上巫峽斷崖怪石懸參差十二峯前弭征棹扶藤直  
上窮所之雲烟變態千萬狀過眼神動驚天隨人疑躋攀  
脚力盡公自樂此良不疲瑤華真妃似夙駕風馬晝下揚

旂旗層巒好處起蒼壁丹霞望門開赤帷登壇定可持瑤  
翠却老未應無玉芝仰天一笑睨寥廓俯視培塿邱陵低  
頗疑游龍出飛躍恍若棲鳳猶娛嬉喬松跨鶴遠近集雲  
雨濟人朝暮爲壇羅野翠有餘潤泉拖修帛無窮時一經  
盼睽更改觀陽臺價重當由茲惜哉牙纛不久駐鵷首未  
轉檣烏馳輕縑素練欲摹寫畫師難著五色施筆端機杼  
始潛運悠然寄興滄洲湄章成密簡綉衣使綉衣翰墨今  
白眉珠酬玉唱兩相尚三歎盡解騷人頤好刊蒼珉示千  
古磨而不磷涅不緇紛紛我輩小巫耳健讀數過徒噫嘻  
待從雨公奠西極安南嶷收關河百二之險剗岷峨萬仞  
之峭大書有宋中興頌東還更和巫山詩

峽中山高將午始見石色

上峽扁舟穩灘平水不波山高見日晚谷遠受雲多亂石  
爭奇怪幽禽自嘯歌若無詩寫興奈此景佳何

石孝友

孝友字次仲南昌人乾道二年進士以詞名有金  
谷遺音

釣臺

桐江坡上一羊裘釣得聲明隘九州天子曷嘗遺故舊先  
生不官事王侯

韓元吉

元吉字无咎號南澗開封人徙居上饒嘗師尹焞

得呂祖謙爲壻師友淵源爲諸儒所推重仕至兵部侍郎書龍圖閣學士封潁川公有南澗甲乙稿

遠遊十首

我行蓬萊巔俯首見月窟誰言滄海深涉之不濡輟顙彼  
驚魚龍起舞相蕩滴衆眞爲一笑黃霧生絳闕獨乘風中  
天蹙踏波上月

東隅有神人被髮兩目丹手擎扶桑枝騰光射乾坤朱鳥  
爲前驅火龍駕後軒祝融不敢瞬衛以千炎官誓當掃霜  
霰九竈常不寒

雷出九地底化爲萬鼓聲豕首柄石斧割然四海馳夔魑  
與罔象辟除靡有遺無私乃帝令風雨多隨之苟能仆夷



伯何怨兒女爲

紫皇宴瓊臺鳳舞鸞且歌翠鬟兩仙女倚歌奏雲和秀色  
炯雙璧晴雲灩秋波曲終顧我笑奈此人間何贈以白玉  
環綢繆期匪他

大鈞轉一氣急轂無停轅是非與生死膠擾于其間朝昏  
互變滅倏忽千萬年豈知達道人直作須臾觀天地本無  
物置之奚足言

海水赴大壑雷奔墮空虛火輪煽金剛蕩然爲尾閭一闔  
復一闔乾坤爲戶樞萬生保靈根至神守虛無嘗以物所  
歸返觀天地初

崑崙九萬里磅礴天地根其下有元圃茲惟衆仙門翩然

兩白鶴導我前飛翻問津牽牛星濯足洪河源九關幸方  
闢乘之遊紫垣

巨軸載厚地沈沈惟九幽日月所不燭鬼神或拘囚負臣  
與支祁亦爲舜禹憂覩彼世上兒對面行奸偷國章幸可  
脫天刑此焉投

生死一大夢夢覺誰當分夢中旣不了雖覺何足云天光  
發吾宇澹然無朝暉至樂不外假至貴斯無文求仙與學  
佛舉世徒紛紛

呼吸爲陰陽動靜乃天地猶然一身間至理無不備蒼龍  
駕白虎晝夜分六氣坎離會精神否泰本仁義吾師不吾  
欺持以御一世

雪中從邢懷正乞酒

櫺具高挂頰風塵客長安長安不宜客歲暮仍苦寒夜聞  
陰風喧曉看雪漫漫天公非惡劇笑我貂裘單坐令歌南  
山白石空巘岼正不妨我嘯憑高事遐觀四海同一雲更  
覺天地寬平湖發遠景松竹如龍鸞巉然兩峰高玉峙峨  
瓊冠緬懷邢公子重城有家園水石帶林沼幽亭壓雲端  
仙粧映疎梅秀色若可餐璇題散冰筍晶鹽貯牙盤清歌  
出絕唱筆間走波瀾幾欲泥君飲持杯聽幽蘭君家碧琳  
腴到手無復殘豈須羔酒兒尙能追清歡蹇驢不敢出強  
作哦詩酸詩成不能寐起舞清夜闌儻可致麴生當作白

玉壇

朱元晦清湍亭

青山足佳遊，遠睇欲無路。稍尋絕澗入，始辨雲間樹。泉聲若招客，倚杖得夷步。驚湍瀉亂石，激激有清趣。風微鳥暝，幽日徹魚影。聚居然魚鳥，樂正欠幽人。佳野僧豈忘機，作亭以茲故。因君賦新詩，我亦夢其處。

陸務觀寄著色山水屏

我居面山俯潺湲，憑軒臥牖皆見山。山光水影入懷袖，秀色爽氣非人寰。故人憐我新結屋，猶恐看山未能足。丹青寫作何許圖，不礙閉門聊縱目。千峯繚繞生白雲，小舟蕩漾橫江濱。樓臺高下出蘭若，杳渺似有鐘磬聞。坐驚巖壑環四壁，寥落高秋變春色。方壺瀛洲遠不隔，武陵桃花定

誰識君不見韋侯絕筆畫古松黑雨白日摧虬龍杜陵老  
翁三歎息況有山木洪濤風又不見玉堂真仙草詔罷靜  
愛春山郭熙畫文章信美身不閒清嶂白波眼中借我今  
乘閒身未衰杖藜獨步哦新詩出門見山入見畫佳興自  
喜來無時臥龍山腰鏡湖尾知有高齋照清泚功名逼子  
未得休歸坐玉堂應記此

檢詳出示所賦陳季陵戶部巫山圖詩仰窺高作歎  
息彌襟范成大嘗考宋玉談朝雲事漫稱先王時木  
無據依及襄王夢之命玉爲賦但云顚薄怒以自持  
曾不可乎犯干後世弗察一切濶以蝶語曹子建賦  
宓妃亦感此而作此嘲誰當解者輒用此意次韻和

呈以資荆掌

瑤姬家山高插天碧叢奇秀古未傳向來題目經楚客名  
字徑度岷峨前是耶非耶莽誰識喬林石廟常秋色暮去  
行雨朝行雲翠帷瑤席知何人峽船一息且千里五兩竿  
頭見幡尾仰窺仙館至今疑行人問訊居人指千年遺恨  
何時伸陽臺愁絕如荒村高唐賦裏人如畫玉色頽顏元  
不嫁後來飢客眼常寒浪傳樂府吹復彈此事牽連到溫  
洛更憐塵襪有無聞君不見天孫住在銀河澣塵間猶作  
兒女語公家春風錦瑟傍莫謂此圖虛斷腸

龜峯行

吾聞靈龜不願死有用于清廟但願曳尾安泥塗所以漆

園吏坐歎清江使者逢豫且龜峯之龜定何物不在泥塗之下乃在萬仞之上高突兀是耶非耶遠莫測安然不動藏其穴伊昔帝堯有聖德此龜無乃負圖出圖成授帝理其骨猶使琢石志之存髣髴又疑神禹碑刊衡山巔碑高上與日月聯此猶其跌棄不取神鬼守護踰千年我欲詰其端此事恍惚無迹往往皆在太古前斗中神人被髮立蜿蜒佐之從汝蟄九陰司存當在此今汝巢南失其職又聞巢縣事頗似伊尹生空桑母姬避水欲徙去待汝兩眼生赤光遂令萬室之邑化作魚與鰲汝乃遁走至此藏上天震威趣汝壽使汝扶服死且僵醜形質磔石笥上不可以灼不可以藉昧奈何猶復不自斂荒崖斷壑反以名字

彰因思支祁鎖頸泗水中帝以巨鎮爰戕壓其宮名之以  
山不以峯豈有形狀與此同吁嗟此山氣象盤薄亦雄偉  
奇峯羅列三十二或如威鳳昂其喙或如俊猫立且戲石  
鐘孤撐危欲墜巖樓矗起見天外大眺么麼不足記神旗  
鐵壁非一類何用獨取汝之名字豈汝黠且庸鼓妖術怪  
百里內使汝生存跌宕安可制我初信汝靈今復知汝凶  
江湖波濤洶湧不一濡汝足雲霧呼噏陰晴變態猶無窮  
不知造物安用此徒以動蕩耳目夸兒童何時巨靈引手  
擲汝八荒外舉頭直見天穹窿

玩鞭亭

黃髮鮮卑勇無策自馳駿馬來窺敵敵人但怪日繞營起



看飛塵已無跡寶鞭不惜棄道傍坐令老嫗知興亡百年  
社稷有天意紆鋒逆焰徒鴟張孤城遺跡森在目平湖無  
波春草綠卻對青山憶謝公公老猶嫌人姓木邊兵已重  
朝士輕中原有路何由行柙中虎兇不可制江左夷吾浪  
得名

閑居遣興

著雨柔桑暗吹風小麥齊江深涵日淨野濶並雲低車馬  
能相問琴書故可攜村村花自好不奈子規啼

山行

秋盡暑猶劇今朝涼意新輕陰能障日小雨不生塵度壑  
時裝策看雲一岸巾鄰僧問何往茗果愧情親

送中甫兄之淮南

老惜親朋別貧知客寓愁青燈耿遙夜濁酒對窮秋寒日  
催征騎新霜倚縣樓因君問淝水莫渡北來舟

病中放言五首

松窻永日度涼颼坐覺清陰寸寸移境靜故應閒可樂形  
臞猶有病相隨塵埃末路思千里風露何年飽一枝百歲  
窮通吾自了閉門長詠子桑詩

長夏空齋冷欲冰幾愁無米溷鄰僧途窮誰爲一舉手計  
拙自宜三折肱風靜鳶飛猶跼跼日斜蚊聚已薨薨此身  
示疾非吾病臥看南山翠作層

歲月催人易白頭只應蝴蝶夢爲周駢躑久悟人間世汗

漫空期方外遊化鶴自知迷故國斷螯今見立神州蓬萊  
水淺君須記蓮葉翩翩僅可舟

寓意平生止墨卿轉喉無奈觸錢神敢將名利期當世直  
欲文章似古人積雨尚添門外轍顛風不掃甌間塵倦游  
儻有凌雲賦肯爲黃金巧致身

少日功名謂立成壯年漂蕩已心驚正平只合依文舉元  
亮何妨慕孔明墓上征西眞底用生前杯酒未宜輕田園  
待足何時足歸赴空山猿鶴盟

過龐祐甫

半畝方園水到門地偏人靜恰如村聲名不用卿王衍文  
字眞能僕屈原舉世知君如我少平生學道欲誰論何時

共結柴桑社籬下秋來菊正

次韻子雲盱眙道中

海上狼烽不起烟兵戈猶記舊年前巖居有客能招隱  
肉食何人爲給鮮但得生涯類盤谷可無風景似斜川  
共尋餽口田三畝仍辦遮頭屋數椽

江南淮北市初通人語忻忻作好風抱來只思耕隴底  
買船誰復渡遼東向來熊耳真投甲此去天山擬挂弓  
上策聖君今自治白頭憂國寸心同

桑間無禍半飢人斗粟千金不換銀末路多慚道溝壑長  
年敢笑走埃塵江聲直下黃牛峽河勢遙分白馬津回首  
向來征戰地壯懷俱在只傷神

晨興

北牕松竹夜蕭騷詩就呼兒進濁醪睡美不知新雨足曉  
來南澗水聲高

同翁子功之平江午憩涵山淨慈寺

蘋花吹盡藕花香日落風生水面涼淨洗扁舟載明月共  
君長嘯飲湖光

蕭之敏

之敏潯陽人官御史

滴翠樓

并序

乾道五年三月十八日遇堪村逆旅主人徐季登  
飲子小樓之上且求樓名子曰亂山滴翠衣裘溫

此東坡昌化之時也請以滴翠名之可乎季登曰  
唯唯賦兩絕以志之

一溪流水漾殘春上有高樓碧瓦新溪路晝陰元不雨却  
愁空翠濕衣巾

樓頭煙翠鎖重重上有白雲終日封對面溪山堪破寂炊  
煙斷處一聲鐘

曾三聘

三聘字無逸新淦人乾道二年進士爲秘書郎孝  
宗病革力主建儲議寧宗朝官考工郎中以忤韓  
侂冑出知郢州尋改彬州辭不赴嘉熙間卒贈直  
龍圖閣諡忠節

玉梁觀

道人抱道常避人閉門三月不識春風風雨雨不相識起  
迎北斗生精神夜來夢揖梅子真脫胎換骨隔一塵玉池  
生液銀河潤嚙嗽自有元和津山中且住不須去九仙嶺  
上雲迷路擣餘藥裹臥松根只在丁當鳥鳴樹

曾興宗

興宗字光祖寧州人公衮子乾道中領鄉薦慶元  
中特奏名授肇慶推官師事朱子朱子歿心喪三  
年築室簣簣谷號唯庵學者歸之

居簣簣

渭川千畝竹可比萬戶侯我有簣簣谷此豈爲食謀南山

與北山清絕真勝遊飛泉動蕭爽怪石添清幽娛親自足  
樂捧檄良可羞日從抱節君崎嶇經林邱有酒對爾酌得  
句爲爾謳共盟歲寒心肯學炎涼儔笑指親密友不獨王  
子猷

陸九齡

九齡字子壽金谿人乾道五年進士官全州教授  
卒寶慶中贈朝奉直秘閣賜諡文達

與僧淨璋

自從相見白雲閒離別常多會聚難兩度逢迎當汝水數  
年隔闕是曹山客來濯足傍僧怪病不烹茶侍者閑不是  
故人尋舊隱祇應終日閉禪關



陸九韶

九韶字子美金谿人九齡弟築室梭山講學其中  
號梭山老圃有集

月石

玉兔愛佳泉飲泉化爲石規圓立山址萬古終不息應厭  
舊星躔盈希多缺夕自從寄茲蹤表表無晦蝕光彩雖暫  
埋體素得不易神物豈終潛早晚照九域

試茗泉

邂逅成山行往往有異景奇怪爭呈露獨不見試茗逶迤  
卽道周泓澄得幽井消之不可濁凝然如自省龜蒙於越  
來鱸亦煮石鼎豈爲渴者甘醉夢當一警

彭龜年

龜年字子壽清江人乾道五年進士嘗上疏請光  
宗朝重華宮述祖宗之法爲內治聖鑑以進與朱  
子約共論韓侂冑之奸以待制寶謨閣致仕卒贈  
寶謨閣直學士諡忠肅有止堂集

別孫隱甫

君家金石臺我家富壽岡十驛苦不遠半世成相望我爲  
一貧驅觸熱來帝鄉塵垢面未頰鬱結志不彊下馬忽見  
君喜劇幾欲狂未語心已傾旣坐形俱忘醒我醉夢中祓  
我冰雪旁主人知客深對著夜雨牀猶恐客意短渠渠羅  
酒漿蟹螯擘新肥荔子含生香晚歸候月影早遊趁湖光

都城六月中公卿簿書忙而我乃與君專此風露涼笑語  
雖雜亂理到味自長平生區區願恰此一月償遽然委我  
去令人熱中腸兒女惜別離丈夫重行藏敢因杯酒行感  
慨徒悲傷君去起我思綵衣拜重陽願言各努力白髮行  
中堂

送楊誠齋赴江東漕

愛公喜公住愛國喜公去公去不可留一節江東路停杯  
與公別瑣瑣不足疏金陵古都會形勢天所付江淮有前  
蔽荆楚無後顧矯首對山河亦足發外懼錢塘六十年帖  
帖泰山措繁華視舊都無復郇瑕慮郇瑕僅憂貧雖貧猶  
未數安得小范老前席借一箸重畫汴洛謀起此宴安癩

金粟互輸送甲兵更守戍去來倘習慣緩急乃暇豫耳聞  
不如見公見况超悟願公細平章心期一言寤從此日暮  
雲不外錦囊句

題王仲顯梅谷

樓前梅十圍屋背花千樹種花識花性培養隨好惡花無  
十日好不憚千日慮那知花已嬌疲憊風能蠱爭如歲寒  
操盤結不擇土時當氣栗烈天地閉其戶蓬蓬起南海呼  
吸萬竅怒向來桃李輩縮氣不敢吐惟有冰玉姿秀發畧  
不沮靜觀萬物理參差乃如許不見千金子宴坐危堂廡  
一朝遇變故倉卒失所措不見陋巷士脫齒甘捽茹脩然  
天地間了不識憂懼達人善觀物在我乃不喻須上再高

樓方能了真趣

同陳秘監諸丈送黃商伯守常州石叔訪守上饒會  
于艮山門張罔以人生五馬貴莫受二毛侵分韻得  
貴字

惠山滋華池玉山潤百卉二賢競出守山水亦自慰人生  
別離難朋舊走相謂尅期會南湖肯託簡書畏敬酌萬石  
君欲難不敢愾願如玉山高物物飽生氣又酌雙井公一  
舉大白既願如惠泉清滴滴濯肺腑擇侯須擇賢無乃拔  
其莠帝城人欲入競進去乃貴誰無螻蟻心早去亦有味  
朝家急賢秋人物欠經緯想當分符時欲遣亦有未幸無  
疾其驅有詔儻可聳

送何同叔赴湖南漕

疇昔登賢書夫子持文衡每見輒忽別問端不能更一從  
齒周行後先佐司成未幾奉辟書復接臺中評詞色陶春  
和風味挹秋清人生事好垂歲晚意始傾云何千里去一  
節湘中行留行我無說脫去公方榮人言轉輸重我視錙  
銖輕望之拾遺願公豈少此情向來否泰疏上亦知忠誠  
公身有內外公意無虧盈雁來書可慰細數新豐程

送范文叔知彭州

吾友范文叔家世岷峨州忠純自性分耿耿明月秋竭來  
聲利場況與造物侔汲引如不及不進不肯休酸鹹性難  
齊委曲能調柔一朝善類合人亦多君謀或者以已量謂

君相比周在我亦何憾  
太空雲自浮俄然動歸興  
瞥去輕于鷗始知進退間  
君子得自由聖主羅象俊  
巖穴窮冥搜何以斗大州  
著我第一流無人子思側  
殷勤爲王留謬當豹尾間  
對此誠包羞五馬豈不貴  
吾非爲君壽君儻知我心  
毋忘天下憂

別周侍郎

東家十畝橘治蠹苛于獄  
課童事別決生意長不足  
不如西家農未麥土已熟  
一朝種子落坐見天地綠  
人便適性事醫乃逢其癡  
有藥不投疾但欲甘于飴  
安知萬全方非取頰舌宜  
誰能味此苦恐厭功效遲

太和到處萌物各從所受  
老農嘉穀心自覺稊稗醜  
道旁

有荆棘斤斧不得宥移根著山阿吾亦付薪樵  
鵲有護巢心鴉負奪巢力紛爭互勝敗卒乃覆其室魯雞  
本非鵲伏穀出羽翼我無拒爾心萬物同一息  
創平痛方定醉甚忽解醒乃作翻然思遽能免心驚君子  
足遠慮小人無隱情有言儻可吐守口何如瓶

土缶

土缶寡譏誚白璧多瑕疵毀譽未必公名起謗亦隨天下  
有真是不在愛惡時青青荆棘塲拍拍蝴蝶飛不如歲且  
寒更試松柏姿

送趙使君老父吟

使君朝天騎霜蹄朔風獵獵吹裳衣鉦鐃聒天山谷應旌



旗弄日龍蛇飛邦人遮留留不得壯兒截鏜小兒泣老翁  
數日相扶攜喘若筒吹行轉疾且行且止相歎嗟若怨若  
慕言紛拏一翁指我門前土向時榛莽今桑麻自言新年  
年九十舊使姓名多記憶從頭屈指細平章清淨安寧今  
第一狡胥每欲挑民爭能令衽席生五兵我公平易與民  
近智巧有盡難施行里中年少號刀筆曾向公庭覘消息  
歸來與我使君明胸中是非紙上律吾農疾苦年來多公  
今歸去誰撫摩留公無計可奈何呼兒起舞吾當歌官家  
神聖似堯禹蠶渡宮深有言路借留誰格向來書猶有民  
謠能取否或聞朝廷虛柄臣須公經濟難逡巡延英奏對  
刻易下囊封日說江南貧

送王仲顯赴瓊州

朔風獵獵搜離思，千山木葉飛東西。山聲互答轟鼓鼙，日影倒亂摩旌旗。瓊山太守行赤帷，父老出餞相扶攜。把袂惜別車去遲，仙都散吏挈榼隨。洗醖酌酒歌別離，別離之歌歌聲希。兒女子態不願爲聖皇擇，守先南陲朱崖況復環生黎。黎山插天海四圍，黎人出沒如鬼魑。凶黥蚘集不受羈，無異生縛虎與羆。乃今錯處海一涯，一日萬變藏幾微。趙張縮手翼黃癡，良二千石非公誰。公行南方易如歸，公舉南事易如攜。向來鹽筴一局棋，白黑紛亂楊朱岐。公能辨晰是與非，袖有長疏天下知。口不可惜人可悲，鬼魑虎羆日夜伺。此時此事分安危，想公再拜辭玉墀。睿意懇

側亦在茲九重寄公萬里師紛紛獄訟不足治從驛遽聽  
東南馳定知召節封金泥不然鹽筴更疇咨服嶺以南公  
一夔與公離別歌此詞愧不以頌而以規

送曹無瑕改常州

夫君愛民勝愛己不愛公卿求刺史得州如斗喜不禁拍  
手催兒治行李朝家急賢不惜官日日中書有除旨周南  
留滯太史歎目斷子公書一紙夫君卻不薄淮陽此見寧  
輸三千里庖丁雖欲善刀去無乃世間多巨髀晉陵繁夥  
視三輔歷徧屏風無可使未央對罷天一笑今日無憂惠  
山水未容遠去引自近早晚賜環差易耳九華卻恐怨君  
王誤我明年花柳喜

送任守赴邕管

吾聞廣南東西四十州諸蠻錯處如虬蟬東州之蠻富珠貝西州有馬供羣騶一從隴右失芻牧萬里山蹊來作足部分驛使視行廐路遠疲農輸食粟邊頭給估不敢慳內地供億那得閒匹馬中人五家產歲入不足充軍頒天子擇侯嚴五管橫山之雄視方面大賢不合著炎方一馬直應勞遠算往時此地驚智高四海倣擾如抑搔要荒易動古所畏况復立制爭錐刀年來馬質亂三物廊廟謀深匹夫忽達官喜事失拊循機矢銛矛變倉猝遠利安蠻福及人公行公行南中春一篇駟頌誰能寫足用愛民功到馬

送梁憲易節漕蜀

雨露收江上星辰下益州有賢容在外爲國豈無憂德旨  
頻將遠君心頓減憂不然那有此定自啟金甌  
峽口大江急劒門天下奇不因逢使節安得入公詩萬里  
輕來去一心無險夷可憐門下士猶惜別離私

寄黃商伯兼簡詹元善

今日蠻荒好逢人說桂林秋應一片雪端在兩公心祈望  
羅明月生黎斲水沈滔滔迷所往莫忘指南針

挽楊邦寧

心事誰能識交遊細細論有居多水竹此世老邱園遺恨  
成千古無人作九原晚來風正惡不忍賦招魂

和李東老韻

胸中塵慮厭多多強把詩書細刮摩幸有長官憐拜起苦  
無公事礙吟哦自慚俗駕爭相逐不識高軒肯見過天濶  
鴈寒人又遠一盃相屬意如何

挽傅德芳主簿

亭亭梁木遽然傾吾里諸生失典型已向東維次箕宿定  
知南斗厭文星書盈故篋墨猶濕影掛虛堂燈自青忍聽  
咽鳴哀挽罷一川東去杳冥冥

重九

露下風高足感傷天君著意寫重陽建安能賦推諸子楚  
國悲愁又九章我爲催租閣詩思誰能送酒沃愁腸黃花  
不解如人意開遍籬根數百行

別徐商老奉祠歸清江

甲寅之冬上命某守荊州某以公在幕府欲固辭  
或曰法不可也旣辭不獲命則僕僕而西已而公  
與某書曰已上祠請矣慚不可忍某到荊兩月公  
祠命下卽日揚舲而東中懷慘然敬賦五絕以寫  
兄弟之情恨不工也目而斥之爲幸已甚

平生兄弟間聚少散亦多欲作對牀夢奈此往復何  
法許公不許法不如公嚴公不爲我留寧避世俗嫌  
我歸不能休公去不可挽依依原隰間相對意無限  
嘗觀金匱書遺逸窮冥搜肯令太史氏挽作周南留  
離離鴻雁行漠漠鱸膾秋誰獨無此情何以寫我憂

曾 丰

丰字幼度樂安人乾道五年進士官德慶太守恬  
于仕進築室曰搏齋有緣督集

登滕王閣

故閣崢嶸已劫灰又看新閣上烟煤斷碑無日不濃墨古  
砌雖秋猶淺苔江闊鳥疑飛不過風輕帆敢趁先開天高  
眼迴詩囊小收拾不多空一來

巖子陵

周家刑不上大夫法固不足禮有餘何人不願立朝路未  
老誰肯甘田廬秦阮學士寘勿論漢嫚大臣眠如奴逖民  
不出朝士去前有兩生後二疏世祖聰明失之察待臣少



禮多以法當時祿位列三公危似千金懸一髮先生識帝  
貧賤時富貴何妨與共之云胡君房畱不住無乃平日窺  
其微龍顏之疎顧豈忍烏喙所伏那可初來高蹈疑矯  
世從後逆覩信知幾退身不勇公孫賀明泣危機終自墮  
先生明甚勇如之天地萬物莫吾挫將星羣立客星孤羣  
恐難調孤易禍帝座旁邊睡熟間夢魂已在桐江臥將星  
耿耿旦今明不比客星明更大

疎山

草徑蜿蜒十里閑雲開若在畫圖看萬松密翠地無影一  
水長清天自寒

謝廣東經略潘直閣席間分韻李濟惠

龜煤不忘遠膠汁寧傷清永言李廷珪墨法能爾精滴瀝  
甚點漆銷銖輕連城胡陳梁浦張後出聲錚錚敢與相頡  
頔江西老潘衡李家風已頽中興有雲仍未空天下伎已  
擅湖南聲公重與物交所厚墨客卿摩頂相許意垂髫久  
要情信手暗摸索心已權重輕乃言濟妙處而有祖典型  
端如坡借力獨惟衡主盟笑捐數寸玉增我雙眼明呼童  
詔羅文折簡延陶泓來陪客卿遊欣然兩相迎涓涓井花  
落澣澣江烟生始堅苦莫揉俄熟恬無爭更請毛錐子三  
益相友朋丙吉魏弱翁姚崇宋廣平剛柔各自稟勲業交  
相成我無換鵝手初不工草行僅能並蚓勢強學蚪蚪形  
暗投漫費璧誤點難成蠅不若舊主人八法俱縱橫敢持

以回旋筆頭貯南溟題詩答公隙草蔬排姦萌聞健賦歸  
田投閒注遺經已重人託之濟價日夜增況不爲濟者何  
當經品評

道人彭永年來番禺過訪相約歸日遊閣皂

雅性苦無他嗜好山之佳處吾皆到江西山半入詩中點  
檢怪猶無閣皂吾家十世江西居南來始得閣皂圖聖文  
橫斜水曲直煤汁濃淡山榮枯燕閒指顧圖之上神遊滿  
意酬心賞已空沙界無大千那知滄溟有方丈詩仙往來  
白雲鄉惟沈廷瑞伊用昌畫簾捲舒納夜月金鼎開闔吞  
朝陽兩篇之外有餘景孟陽摹寫得要領陳孟陽有閣皂詩或云  
圖是無聲詩猶將夢幻對泡影薄齋或是武夷曾道人未

必非老彭相逢恍惚似前世一笑春容話長生大道一成  
百無恐仙家猶被死生動逃劫莫如徐佐卿山行未免飛  
矢中道人詞詘不敢應殷勤約我遊青城橫江孤鶴飛且  
鳴便是道人出相迎

初秋夜歎

髮髯蟾蜍影蕭騷蟋蟀聲秋隨桐葉到心與鬢毛驚舊出  
班無數新添白幾莖百年成底事攬鏡若爲情

陳子尚滄洲趣

湘江之水清悠悠滄江宛在江中流猗蘭青青結幽思杜  
若紛紛生遠愁前灣瞥見一漁艇何處飛來雙白鷗帝子  
不歸煙雨暮參差次斷楚天秋

陸九淵

九淵字子靜金谿人九韶弟乾道八年進士官著作丞光宗卽位除知荆門軍務卒諡文安嘗結精舍于貴溪之象山學者稱象山先生有集

應天山

我家應天山山高數萬丈上開園池美林壑千萬狀山西有龍虎烟霞耿相望寒清漾微波暖翠圍前障天光入行舟野色隨支杖吾黨二三子幽賞最清曠引興谷雲邊題名岩石上碧桃吹曉笙白鶴驚春帳一笑詠而歸千載應可尚

疎山

村靜蛙聲幽林芳鳥語警山磬分皓葩隴麥搖青穎離懷  
付西江歸心薄東嶺忽忘飢歎憂翻令發深省

子規

柳院竹亭茅店雲蕪風樹烟溪聽徹殘陽月下不論巴蜀  
東西

李大異

大異字伯珍新建人乾道八年進士仕至諫議大  
夫知建康府

曾兄惠然見臨篤叙世契示以先哲遺墨稽首敬觀  
因題其後

家傳文獻六經香袖有驪珠日月光喬木陰陰人已遠祇

應故笏在甘棠

劉迂

迂字漫翁號巢松宜黃人隱居不仕嘗以詩請益於朱陸諸儒著有漫塘文集

靈谷

去途歸盡黛眉橫點染溪頭六曲屏春入翠微殘照紫天  
含空碧斷峰青城藏遠樹江明滅人沒蒼烟路渺冥定有  
子真耕谷日移文不負北山靈

傅子雲

子雲字季魯金谿人陸象山門人嘗主甌寧簿著有易傳論語集傳中庸大學解孟子指義離騷經

解

贈桂琴隱先生

五載飛鷹迅孤蹤病馬羈望東嘗把酒傾蓋便論詩玉在山俱潤泉寒練正垂二雛方刷翼行矣陟天池

王 密

宙宇德升新淦人困躓場屋遂入玉笥山依道士潘與齡獨居白雲齋十餘年卒

礬山道中

灘石韻寒泉依稀言語處回頭覺無人又上前溪去

山樵

山樵竹裏居略約纔堪渡落日澹平疇牛羊點寒暮



謝堯仁

堯仁字夢得邵武建寧人淳熙元年以宏辭薦於鄉後徙家南豐之市山以終學者稱嶺菴先生著有鹿峰集嶺菴集

九日登屏山

有約携壺九日遊扶筇選勝豁雙眸天空晴送羣峰翠野曠寒生落木愁濁酒攸饒狂士態黃花羞插老人頭憑高不管風吹帽坐破屏山一色秋

謝驛

驛宇處厚堯仁子父子以詩文並名江湖間南軒張栻于湖張孝祥咸敬愛之

軍峰

倚天青壁瘦巉巖下有神龍捲作潭龍欲出時山吐氣黑  
雲隨手暗江南

杭州

誰把杭州曲子謳荷花十里桂三秋那知卉木無情物牽  
動長江萬里愁

楊長孺

長孺字伯子自號東山潛夫吉水人萬里子淳熙  
元年舉制科嘉定間爲番禺帥理宗朝累召不起  
以集英殿修撰致仕家居晚號農圃老人有知止  
休官東山等集

跋大人論配享書藁

覆羹真得皐  
襲書錦水元來勝石渠  
但寶銀鉤并鐵畫  
何須玉帶與金魚

羅椿

椿字永年號就齋廬陵人楊誠齋門人累舉進士  
不第

寄楊誠齋

不愁風月祇憂時  
髮爲君王寸寸絲  
司馬要爲元祐起  
西樞政坐壽皇知  
苦辭君命驚几子  
清對梅花更與誰  
夢繞師門三稽首  
起敲冰硯訴相思

送永豐汪令

錦纈梅花浦江南作縣歸新來薦鶚牘驚動袞龍衣歲晚  
情難別心親事却違恐君天上去扶病出烟霏

彭仲衡

仲衡清江人

了頭巖

前峰號龜今是龜近巖謂月亦非月世間景幻語未真說  
著了頭便癡絕蒼然頑石由天成道旁過者皆含情我來  
于此發浩歎乃知有色能傾城

林夢英

夢英字伯虎閩清人徙撫州游陸象山之門登淳  
熙二年進士歷秘書丞學者稱山房先生

金石臺

雲作巖扉風自關清陰半壑樹中閒  
傍廂更著茅亭好放入西南一面山

碧澗書堂

臨川遇鄒君示我銅陵辨相邀游其間  
百歲須一踐自從雙耳聾已辨兩足  
蘭武夷乃招隱仙都輒策蹇遙睇麻源  
村夢思勞輾轉今披碧澗記華岡訂訛  
舛疑信吁莫論是非爭之禍但欣泉石  
奇堂成書可輦晁侯雲夢胸妙處參  
墳典家有萬竹坡琳琅閣營翦徘徊康  
樂舊此興尤不淺人生貴自得假物非  
至善山川侈遭逢所託各偕顯巖光  
釣越灘叔子登楚岷氣象不低摧吾徒  
志當勉相思邀未

到烟霞自舒卷唯應原上月共照人孤獨

羅點

點字春伯崇仁人淳熙二年進士光宗朝累遷試  
兵部尚書寧宗朝拜端明殿學士簽書樞密院事  
卒贈太保謚文恭

巴山喜雨

淑元不冠椎兩髻縈青綰綠如堆雅髻鬢遠望毛髮古日  
日惟聞餐暮霞吾家公遠更清絕帶眼不穿衣不結好風  
吹袂任飄遙夜夜惟聞弄明月餐霞弄月固不惡不道農  
田布龜灼令君盛服道民苦偃然袒裼猶不忤敬持此意  
欵浮邱浮邱乃與令同憂急呼風馬駕雲車二仙方覺裸

程羞旋加冠巾更束帶一見浮邱望塵拜便將凶歲變豐年談笑之間作霽霽油然雖出南北峰開端實自浮邱翁浮邱詩家老仙伯故知憂國願年豐邦人一飽誰所賜父應詔子兄詔弟若還此雨後五日將見索汝枯魚肆

劉名世

名世宜黃人淳熙二年進士紹熙初知浮梁縣

墨池發祥詩呈蔣教

韓子蒼雜抄云池中忽時水黑輒有物如蜴蜥之狀隱然自水底而出謂之墨龍士之試於有司者每謂此物現則得人多往往皆驗

城頭學宮高巍巍中有方井號墨池窮冬不竭春不溢往

往石眼通江湄故老相傳右軍宅滌硯濡毫向池側蘭亭  
絕筆跡成塵此間池水猶能黑紹興之年值丙寅一夕鬱  
鬱浮烏雲鄉閭拭目看盛事集英三唱人姓陳又聞淳熙  
改元歲隔春預作文章瑞甲科奪得漢庭魁賢關解褐冠  
多士九歲奇童面聖顏闔閭十人俱賜第近來復作烟霧  
飛盈盈玉斗磨歛絲忽焉陰霾黯蒼漠模糊頃刻風披披  
巧如奇花開異草天女織出綉綃衣須臾變態千萬狀妙  
手點染水墨奇此事頗亦涉神怪疑有鬼物來遊嬉不然  
下墊千年龜圖書之祥將發揮吾鄉文物盛洙泗執經問  
道肩相隨殘膏賸馥大沾溉諸生借潤今其時文昌終有  
應圖契韓門高第皆可爲先令地脈進佳貺主張在公非



義之

章 穎

穎字茂獻新喻人淳熙初上萬言書二年登進士官禮部尚書升侍讀尋奉祠嘉定中卒操履風節爲考亭所推贈光祿大夫諡文肅

送長子琳連州刺史入覲

衝雪登長道吾兒更勉旃人常談作郡汝且去朝天身歷窮間久條陳正宁前故人如問我爲說病彌年

盛 璫

璫字溫如豐城人領淳熙四年鄉薦以平山寇功授奉節郎創書院于盛家洲朱文公嘗過訪贈以

詩

朱元晦過訪

蒼松翠竹映斜暉  
野菊花開過客稀  
葉底黃蟲作寒繭  
雨餘蝴蝶滿園飛

梅花樹下三間屋  
挂壁枯桐盡日閑  
有客過門彈一曲  
斷雲殘雪滿空山

甘同叔

同叔字叔異豐城人  
淳熙五年進士官桂州民曹  
攝荔浦縣與同邑盛璉于革  
劉充齊名號豐城四傑  
有節軒集

題昌山聖姥廟

分宜古縣環清溪重岡複嶺如奔馳行逢山斷水流處閱  
城廟枕山之西我來落日在前嶺摩挲一讀盧肇碑嗟唐  
今去亦已久尚餘文字光陸離云昔秦人有天下鏖戰六  
國愚黔黎碭山雲氣望不見神物乃降江之潒雷轟電合  
助光怪蜿蜒墮地偕羣兒赤鯢王鮪奉鼎俎追逐甘旨憐  
姥慈姥先仙去環佩冷安能蟠螫從兒嬉劉累不出浮俗  
隘況肯委質嬴與斯珠宮貝闕世所希銅環十二白玉扉  
紉蘭作佩香披披招搖手掉芙蓉旗哀彈青瑟和宓妃大  
川擊鼓勞馮夷巨魚踴躍鼉鼉隨蝦蟇瑣細不得追廟門  
開闔風颺颺千年萬載龍居之野巫使伺薦酒卮簫鼓坎  
坎來宮祠五彩不辨虺與螭卿以幻化驚羣迷嗟我四海

久望霓無復空抱明月輝好施膏澤雨六合豈止但慰袁  
人思歷階酌水致此辭退以遺誼傳于詩才慳語類論甚  
卑龍兮謹勿相訶譏

于革

革字去非號竹國豐城人年十三能賦詩嘗從朱  
子遊淳熙八年進士知房州有集

春晚

舍南舍北草萋萋原上行人路欲迷已是春寒仍禁火  
花風急子規啼

詠箋

七八葉蘆秋水裏兩三箇雁夕陽邊筆頭到處渾無礙掃

破寒潭萬頃烟

清都觀

高崖雨洗月華清白  
稔青藤曳履行老檜  
不知仙馭遠屋頭  
猶帶玉簫聲

劉季裴

季裴字少度安福人  
孝宗朝終秘閣修撰

壽朱守

康鼎談經世少雙  
一時文物動虞庠  
江湖雖隔金閨籍  
衣袖仍聞玉案香  
墨客幾年陪畫隼  
板輿平日到諶堂  
時清身健堪行樂  
未見荆榛老鳳凰

舒邦佐

邦佐字平叔一字輔國號雙峯靖安人淳熙八年  
進士主簿善化遷衡州司錄參軍紹熙中朱文公  
帥長沙以疾乞歸著有雙峯藁

雨後卽事

昨日雨不歇薄晚雲未收更闌望天宇雲靜月如鉤曉開  
讀書窗日光潑雙眸蔬食羹一盂起傍吾廬遊一洗塵土  
全水竹清更幽問花無恙否低面含嬌羞驗笋長幾何突  
角淩羊牛前日移新荷常恐水葢頭池邊報平安小葉三  
四浮竹林叫鉤輈柳陰鳴栗畱趁晴欲雙飛更著喚婦鳩  
物適吾亦適投筇思悠悠却歸堂上坐蒼頭獻茶甌兒聲  
清且美讀書如瀉油靜裏無聲樂閨中不繫舟不知腰金

公曾識此樂不我生微官縛有如冠沐猴常恐舍此去永  
愧池上鷗

讀退之傳

退之二十八三上宰相書晚折王廷湊罵佛戒鱷魚少時  
及壯歲君試觀何如士養要如此含抱凌太虛

董居誼

居誼字仁夫臨川人淳熙八年進士歷官四川制  
置使奉祠歸有集

戚姑山

重上危樓意豁然倚闌檢點舊山川身離城郭塵囂裏眼  
到雲天杳靄邊祇恐老松添歲月長教修竹障風烟回思

燭火書窗下僕指如今六十年

李 泳

泳字子永號蘭澤廬陵人淳熙中嘗爲溧水令又爲阮冶司幹官與兄洪子大漳子清弟浙子秀詮子召著李氏華萼集

題甘將軍廟卷雪樓

卷雪樓前萬里江亂峰卓立森旗槍上有甘公古祠宇節制洪流掌風雨甘公一去踰千年至今忠氣猶凜然我來再拜攬塵跡斜陽白鳥橫蒼烟

俞國寶

一作于國寶

國寶臨川人淳熙太學生有醒菴遺珠集



山茶

花近東溪居士家好携樽酒欸携茶玉皇收拾還天上便  
恐筠陽無此花

章敏德

一作童敏德

敏德臨川人生乾淳間不仕

湖州題顏魯公祠堂

挂帆一縱疾于鳥長興夜發吳興曉杖藜上訪魯公祠一  
見目明心皦皦未說邦人懷使君且爲前古惜忠臣德宗  
更用盧杞相出當斯位誠艱辛生逆龍鱗死虎口要與乃  
兄同不朽狂童希烈何足罪姦邪嫉忠假渠手乃知成仁  
或殺身保身不必皆哲人此公安得世復有沈空几馬須

騏驎

章甫

甫字冠之鄱陽人自號易足居士徙居眞州常舉  
秀才少從張于湖遊與陸放翁韓南澗呂東萊諸  
人唱和著有自鳴集

送孫文輔尉新城

我來淮上居忽忽歲月過定交誰最久有唱君必和棊枰  
角勝負文字工切磋雲山結伴遊風雨對牀臥那知世塗  
隘但喜客愁破出處方乃殊離別情無那江城失益友山  
縣得良佐平生愛圖史晚歲職警邏枹鼓常不驚雞犬亦  
相賀強飯君勉旃功名看老大

雨中舟出潮牖

官吏急星火驅民疏漕河城中三尺泥歲晚風雨多雨聲  
來未已清滿幽人耳曲肱篷底眠船隨夜潮起

卜宅

卜宅定何好廬山泉石奇夜夢五老人問我歸何時山中  
有蕨薇可以療予饑束書早歸來長歌歌紫芝

落葉

青青池邊樹歲久獨婆娑鳴蜩炎暑時愛此清陰多西風  
一披拂顏色已非故朝看一葉飛暮落渾無數葉落華歸  
根明年發陽春人生豈長好日月如飛輪

別陸務觀

江南江北雖一水欲濟無由若千里那知奔走避邊塵  
邂逅西津見君子一飯山間同野僧花前把酒看張燈  
醉吟落紙筆不停畱客夜闌雙眼青才氣如公端有幾  
半刺江城聊復爾新年華省用名郎謂韓無咎彙征公合聯翩起人生  
相知貴知心道同何必問升沈客袂此時成暫別詩盟他  
日會重尋

寄趙鄂州

田家禾黍方登場枯桑索索天雨霜黃花籬落尚可醉今  
我不樂思武昌武昌使君半年別前日書來慰愁絕相思  
爲我作西亭徙倚欄杆只明月大材開府何優游政聲日  
隨江水流賜金增秩未爲寵咫尺丹詔催歸輶燈前春雨

同揮翰南風吹船着淮岸雲間過鴈喚愁生短褐飯牛歌  
夜半

寄淮東總領許叔庸

太平寺裏畱詩別江北江南幾秋月那知未著侍臣冠坐  
總軍儲持使節平生一飯不忘君蟠胸萬卷皆經綸聞說  
別來頭更白憂國祇今能幾人憶昨同傾京口酒笑我凋  
零已蒲柳曉驅黃犢破荒烟畱眼看公印如斗短篇自昔  
蒙品題老矣無復能新奇樂府流傳妙天下小胥鈔寄定  
何時

憫農

前村後村水車聲唧唧終夜鳴皇天不雨四十日高

田何止龜兆出田家眼穿望早禾早禾不熟奈饑何今年  
神祠禱不應沽酒買牛空費多天公高居民父母有耳應  
聞下民語乞我滂沱半朝雨免遭縣吏鞭笞苦

### 惜花

前日西風不肯住紅雨粼粼落深樹昨日東風更放顛香  
雪紛紛飄滿園四時催人頭髮白薄相春風亦欺客漸覺  
繁枝過眼空歷歷黃花亂疎麥野店沽酒酸如齋先生不  
飯春將歸屋頭向晚雨聲急自炷爐香坐槃膝

### 春盡

豐永花陰直風輕麥浪勻僧歸還逼夏鶯語欲留春鬚髮  
垂垂老親朋往往貧地偏人事少聊以寄吾真

山行

江行風浪惡石路僕夫勞一水幾回度亂山無數高村醪  
清似鏡早稻細如毛愁聽田家語令人首屢搔

松滋縣作

月近中秋白雲隨落日橫途窮諸客味歲晚見交情念舊  
傷存沒憂時尚戰爭西風催起枕鷗鷺莫寒盟

春望

東風吹水豈容平小雨催花却易晴旅燕欲來春社近故  
人何處晚山橫不才媿忝諸侯客苦思難攻五字城芳草  
滿庭無一事竹間幽鳥變新聲

寄韓漕子雲

詔書淮上遂休兵玉帛相隨下帝京且喜王師還禁衛獨  
煩使節在邊城轉輸積雪河水合離別春風塞草生細札  
催歸應不晚到家猶及趁清明

燈夕戲簡晉直夫

小雨催耕苦未勻東風吹水起魚鱗兵戈關塞今年定燈  
火江城此夜新萬點飛花愁客子一天明月屬遊人舊時  
面壁晉居士何處笙歌作好春

春晚寺居卽事

晚晴鳥雀喜窺簷客舍餘寒怕捲簾多病新來知本草安  
心老去讀楞嚴髮稀帽側頭慵櫛火冷香消手自添百念  
不生惟飽飯春山蔬笋十分甜



睡起

日長睡足傍簾櫳  
庭院初收落絮風  
葉底櫻桃渾可摘  
黃鶯不離綠陰中

寄荆南故人

餘生自拚一虛舟  
未害尋詩慰客愁  
梅欲飄零猶醞藉  
柳纔依約已風流  
關心弟妹無黃犬  
入夢江湖有白鷗  
別後故人相念否  
東風應憶仲宣樓

湖上吟

誰家短笛吹楊柳  
何處扁舟唱采菱  
湖水欲平風作惡  
秋雲太薄雨無憑  
近人白鷺應方去  
隔岸青山喚不應  
好景滿前難著語  
夜歸茅屋望疎燈

程端蒙

端蒙字正思鄱陽人朱子門人淳熙七年領鄉貢

補太學生對策不合時遂不復應舉

按通志作德興人今據朱

子正思墓表

絕句

滿城塵土污人甚出郭青山入眼多  
挈取小舟烟霧裏此生真個老漁蓑

陳 銘

銘字日新玉山人淳熙八年進士博學能文判撫  
州考績至都因天變上陳十事特授奉訓大夫

春波漁市

瀕溪有居壓兩岸舟競機風含水氣腥曉作漁入市魚羹  
何處無無錢買金鯉

一許錫

錫字晉之樂平人淳熙中進士令建昌用其西山  
薦官夔路運判與利除弊尋除刑部郎中以言事  
取忤乞祠知漳州不赴致仕卒

葛山

平時西北望山峯我忽西行山忽東東望不如西望好只  
緣身已出山中

徐得之

得之字思叔臨江人夢華弟淳熙中進士官通直

耶

試雙井茶

先生老作宜州鬼  
誰與一甌同注湯  
至今捧著雙井椀  
猶帶是翁書傳香

江西詩徵

卷十六

宋十二

三

江西詩徵卷十六